

Na temelju člana 6. Zakona o računovodstvu i reviziji Bosne i Hercegovine ("Službeni glasnik BiH", broj 42/04), člana 7. stav Zakona o računovodstvu i reviziji u Federaciji Bosne i Hercegovine ("Službene novine Federacije BiH", broj 32/05), Upustva o osnovama i kriterijima kontinuirane profesionalne edukacije u BiH („Službeni glasnik BiH“, br. 42/09) i čl. 6. i 27. Statuta Saveza računovođa, revizora i finansijskih radnika Federacije Bosne i Hercegovine, Upravni odbor Saveza računovođa, revizora i finansijskih radnika Federacije Bosne i Hercegovine na 46. sjednici donio je:

P R A V I L N I K O KONTINUIRANOJ PROFESIONALNOJ EDUKACIJI

I - UVOD

Član 1.

Ovim Pravilnikom regulirani su pojmovi relevantni za njegovu primjenu; obaveza i sadržaj kontinuirane profesionalne edukacije (u daljem tekstu: KPE); oblici i način bodovanja KPE; način izvođenja organiziranih oblika KPE; dokazivanje i vođenje evidencija o ispunjavanju uslova KPE i druga pitanja u vezi KPE, u skladu sa Pravilima IFAC-a, Smjernicama UNCTAD-a, Kodeksu etike profesionalnih računovodstvenih eksperata, Međunarodnim obrazovnim standardima (MOS), zakonima o računovodstvu i reviziji Bosne i Hercegovine i Federacije BiH, osnovama i kriterijima koje je utvrdila Komisija Bosne i Hercegovine za računovodstvo i reviziju (u daljem tekstu: Komisija) i drugim relevantnim propisima i standardima.

II - ZNAČENJE POJEDINIH POJMOVA

Član 2.

Pojmovi koji se koriste u ovom Pravilniku imaju sljedeće značenje:

Kontinuirana profesionalna edukacija - proces obnavljanja, proširivanja i osuvremenjivanja stručnih znanja u računovodstvenoj profesiji i srodnim djelatnostima (profesijama), koja doprinosi stručnosti računovođa, revizora i srodnih profesija, u skladu sa Pravilima IFAC-a, Smjernicama UNCTAD-a, Kodeksu etike profesionalnih računovodstvenih eksperata, Međunarodnim obrazovnim standardima (MOS), zakonima o računovodstvu i reviziji BiH i Federacije BiH, osnovama i kriterijima koje je utvrdila Komisija i drugim relevantnim propisima i standardima. Provodi se kontinuirano u trogodišnjim pomjerajućim razdobljima.

Pomjerajuće razdoblje - trogodišnje razdoblje u kojem svaki član računovodstvene profesije i srodnih djelatnosti (profesija) treba do ispuni obavezu od najmanje 120 bodova/sati KPE, odnosno po 40 bodova/sati godišnje, a koje se ne okončava po isteku jednog razdoblja već predstavlja kontinuitet u istim vremenskim razdobljima, sve dok pruža profesionalne usluge.

Računovodstvo - informacijski sistem koji procjenjuje, obrađuje i saopćava finansijske informacije o pravnoj osobi.

Knjigovodstvo - evidentiranje, klasificiranje i sumiranje poslovnih transakcija pravne osobe i čuvanje originalne poslovne dokumentacije koja pruža dokaze o ovim transakcijama.

Računovodstvena profesija - profesija koja obuhvata računovodstvene i revizorske poslove, usluge i druge srodne usluge.

Ostale (druge) srodne djelatnosti (profesije) - uključuju djelatnosti, poslove ili usluge koje obavljaju: interni revizori, ovlašteni procjenitelji, finansijski analitičari, porezni savjetnici i stečajni upravitelji.

Član računovodstvene profesije - osoba koja obavlja poslove i profesionalno pruža usluge iz računovodstvene profesije, a član je jednog od profesionalnih tijela u BiH priznatih od Komisije.

Profesionalna tijela - nevladine, dobrovoljne i stručne udruge u BiH, koje su od Komisije priznata kao dobre profesionalne računovodstvene organizacije dobre reputacije.

Samoedukacija - forma KPE koju član profesije samostalno ispunjava u sklopu pružanja profesionalnih usluga, a koja se potvrđuje sastavljanjem ili sudjelovanjem u sastavljanju minimalno jednog izvještaja (finansijskog, revizijskog i dr.).

Ostali oblici edukacije - svaka druga forma edukacije koja nije navedena u članku 6. ovog Pravilnika, a koja se odvija u okviru općeg sadržaja KPE, koju član potvrđuje uvjerenjem o sudjelovanju na takvom programu.

Certifikat - pisana isprava kojom Savez računovođa, revizora i finansijskih radnika Federacije Bosne i Hercegovine (u daljem tekstu: Savez), kao profesionalno tijelo u Federaciji BiH priznato od Komisije, potvrđuje da je osoba položila stručni ispit pred nadležnom komisijom i stekla odgovarajuće profesionalno zvanje.

Licenca - javni dokument koji predstavlja dozvolu za rad u računovodstvenoj profesiji i srodnim djelatnostima (profesijama). Licenca se izdaje na određeno vrijeme i produžetak (reizdavanje) licence ovisi od poštivanja pravila profesionalnog tijela, a posebno od zadovoljavanja uslova KPE.

Stručni časopisi - časopisi koje izdaju profesionalna tijela ili druge pravne osobe (gospodarska društva), a koji su kao takvi priznati i odobreni od Komisije. Stručni časopisi obrađuju teme iz oblasti računovodstva, revizije i drugih srodnih znanja.

Tehnički komiteti / grupe za diskusiju - grupe koje na formalnim sastancima prihvaćenim od profesionalnih tijela raspravljaju o pitanjima iz oblasti u okviru propisanog sadržaja KPE.

III - OBAVEZA I SADRŽAJ KONTINUIRANE PROFESIONALNE EDUKACIJE

Član 3.

Svaki član računovodstvene profesije i srodnih djelatnosti (profesija) obavezan je da realizira - pohađa kontinuirano profesionalno obrazovanje u okviru osnova i kriterija KPE koje je utvrdila Komisija, a koji su bliže definirani ovom Pravilnikom.

Svaki član računovodstvene profesije i srodnih djelatnosti (profesija) je dužan ispuniti kriterij KPE u trajanju od najmanje 120 bodova/sati tijekom svakog trogodišnjeg pomjerajućeg razdoblja, odnosno najmanje 40 bodova/sati godišnje, kao uslov za izdavanje licence za narednu godinu.

KPE se provodi kao samostalno obrazovanje (individualna edukacija) i kao organizirana edukacija (sudjelovanje na seminarima, kursevima, radionicama, simpozijima i drugim vidovima organizirane edukacije), odobrenim od Upravnog odbora Saveza.

Najmanje jedna polovina bodova/sati mora biti odslušana na stručnim predavanjima, tj. u sklopu odobrene organizirane edukacije.

Član 4.

Samostalno obrazovanje (individualna edukacija) se obavlja tako da član profesije prati stručnu literaturu na temelju koje će proširi i unaprijediti svoja znanja u struci, a koje Upravni odbor Saveza prihvati kao stručnu literaturu.

Profesionalna znanja se potvrđuju i objavljivanjem stručnih knjiga iz oblasti računovodstva, revizije i drugih srodnih oblasti, s recenzijom univerzitetskog profesora, kao i objavljivanjem tekstova u stručnim časopisima priznatim od Komisije.

Član 5.

Organizirana edukacija se kvantificira brojem bodova/sati za svaku organizacijsku formu na kojima je kandidat sudjelovao (seminari, savjetovanja, kursevi, radionice, simpoziji i dr.), a koju je prethodno odobrio Upravni odbor Saveza.

U Program kontinuirane profesionalne edukacije ulaze samo oni oblici organizirane edukacije koji su kao takvi priznati od strane Upravnog odbora Saveza.

Član 6.

Sadržaj KPE obuhvata sljedeće oblasti:

- (a) računovodstvo, reviziju, finansije i druga s njima povezana znanja;
- (b) organizacijska i poslovna znanja i
- (c) znanja i kompetentnosti u oblasti informacijskih tehnologija.

Detaljan sadržaj pojedinih oblasti utvrđen je u Uputstvu o osnovama i kriterijima kontinuirane profesionalne edukacije u BiH, kojeg je donijela Komisija.

IV - OBLICI KONTINUIRANE PROFESIONALNE EDUKACIJE

Član 7.

Članovima računovodstvene profesije i drugih srodnih djelatnosti (profesija) stoje na raspolaganju sljedeći oblici KPE, sa sljedećim pripadajućim brojem priznatih bodova/sati KPE u okviru jedne godine:

- Prisustvovanje kongresima i simpozijima koje organizira profesionalno tijelo ili društvo (pravna osoba) ovlašteno od strane profesionalnog tijela: maksimalno do 10 bodova/sati.
- Prisustvovanje jednodnevnim programima edukacije (seminarima, savjetovanjima, kursivima, radionicama i drugim sličnim programima) koje organizira profesionalno tijelo ili društvo (pravna osoba) ovlašteno od strane profesionalnog tijela: do 7 bodova/sati, s tim da se programi na temu pripreme godišnjih i polugodišnjih finansijskih izvještaja priznaju i boduju samo po jedan put u toku jedne godine;
- Predavanja na simpozijima, seminarima, savjetovanjima, kursivima, radionicama i drugim organiziranim oblicima KPE, iz oblasti vezanih za profesionalne obaveze i sadržaj KPE, koje organizira profesionalno tijelo ili pravna osoba (gospodarsko društvo) ovlaštena od strane profesionalnog tijela: do 5 bodova/sati;
- Sudjelovanje i rad u tehničkim komitetima / grupama za diskusiju: maksimalno do 3 boda/sata;
- Pretplata na stručne časopise priznate od Komisije, koje izdaju profesionalna tijela ili druge pravne osobe (gospodarska društva): maksimalno do 8 bodova/sati;
- Objavljena stručna knjiga iz oblasti računovodstva, revizije i drugih srodnih oblasti, s recenzijom sveučilišnog profesora: maksimalno do 15 bodova/sati;
- Objavljeni član iz oblasti računovodstva, revizije i drugih srodnih oblasti u stručnom časopisu priznatom od strane Komisije: maksimalno do 5 bodova/sati;

- Samoedukacija i ostali oblici edukacije: maksimalno do 5 bodova/sati.

Član 8.

Član računovodstvene profesije i srodnih djelatnosti (profesija) slobodno bira oblike KPE, definirane ovim Pravilnikom i priznate od profesionalnih tijela, kako bi ispunio minimum uslova KPE iz člana 3. ovog Pravilnika.

Član 9.

Izvođenje organiziranih oblika KPE će se odobriti svim potencijalnim izvođačima – gospodarskim društvima (pravnim osobama) koji se blagovremeno obrate Upravnom odboru Saveza sa prijedlogom tema i predavača za predloženi oblik organizirane edukacije, a koje Upravni odbor Saveza, na temelju kriterija utvrđenih Uputstvom Komisije i ovim Pravilnikom, odobri kao dio Programa kontinuirane profesionalne edukacije.

Svi vidovi KPE iz stava 1. ovog člana će se obavljati uz obavezno korištenje imena Saveza i uz odgovarajuću naknadu Savezu koju utvrđuje Upravni odbor Saveza, posebnom odlukom.

Upravni odbor Saveza će, do kraja svake godine, na web stranici Saveza i u dnevnim novinama koje se izdaju u Federaciji BiH objaviti javni poziv potencijalnim izvođačima za dostavljanje okvirnog programa KPE kojeg namjeravaju organizirati u narednoj godini.

Savez je dužan osigurati da njegovim članovima bude omogućeno najmanje 80 bodova/sati obobrenih programa KPE tijekom svake godine.

IV - EVIDENCIJE O KONTINUIRANOJ PROFESIONALNOJ EDUKACIJI

Član 10.

Savez će za svakog svog člana, uz registar o stečenim profesionalnim zvanjima, voditi i evidencije o ispunjavanju uslova KPE iz člana 3. ovog Pravilnika.

U cilju vođenja evidencija iz stava 1. ovog člana, izvođači organiziranih oblika edukacije, koje je odobrio Upravni odbor Saveza, dužni su prisustvo tim programima KPE upisivati u evidencijske knjižice certificiranih članova računovodstvene i srodnih profesija, a spiskove certificiranih članova koji su prisustvovali tim programima dostavljati Savezu u roku od 15 dana po okončanju svakog odobrenog programa.

Član 11.

Svaki certificirani član računovodstvene profesije i srodnih djelatnosti (profesija) dužan je istekom svake godine osigurati dokaze da je ispunio zakonom i ovim Pravilnikom propisanu obavezu od najmanje 40 sati/bodova KPE u toj godini, a kao preduslov za izdavanje licence za narednu godinu.

Zavisno od oblika KPE, dokazi iz stava 1. ovog člana su:

- Ovjere izvođača organiziranih i od Upravnog odbora Saveza prethodno priznatih oblika edukacije u evidencijskoj knjižici, koje moraju odgovarati evidencijama koje vodi Savez u skladu sa članom 10. ovog Pravilnika;
- Kopija objavljene knjige ili člana;
- Potvrda organizatora o održanim predavanjima u okviru priznatih programa organizirane KPE;
- Pretplata na časopis priznat od strane Komisije, na ime i prezime člana profesije, što se utvrđuje na bazi spiskova pretplatnika koje su nakladnici časopisa dužni dostaviti Savezu,

odnosno, ako pretplatu plaća poslodavac, na bazi potvrde – izjave poslodavca da je pretplata izvršena za konkretnog člana računovodstvene profesije koji je kod njega zaposlen (prilog potvrdi: kopija računa za pretplatu);

- Potvrda o učešću u radu komiteta / grupa za diskusiju, priznatih od strane Saveza;
- Potvrda društva o sastavljanju ili sudjelovanju u sastavljanju minimalno jednog izvještaja (finansijskog, revizijskog i dr.);
- Ostali ekvivalentni dokazi o KPE priznatoj od strane Saveza.

Član 12.

Troškove KPE snose korisnici - nositelji zvanja, odnosno njihovi poslodavci.

Visinu naknade za izdavanje i obnavljanje licenci utvrđuje Upravni odbor Saveza, posebnom odlukom.

V - PRIJELAZNE I ZAVRŠNE ODREDBE

Član 13.

Komisija je na sjednici održanoj 21. 12. 2009. godine potvrdila da su odredbe ovog Pravilnika sukladne Uputstvu o osnovama i kriterijima kontinuirane profesionalne edukacije u BiH.

Član 14.

Izmjene i dopune ovog Pravilnika vrše se po postupku kako je i donesen osnovni tekst, uz prethodnu suglasnost Komisije.

Član 15.

Stupanjem na snagu ovog Pravilnika prestaje da važi Pravilnik o kontinuiranoj profesionalnoj edukaciji lica iz računovodstvene profesije broj:PR-1/12-05 od 7.11.2005. godine.

Član 16.

Ovaj Pravilnik će biti objavljen na web stranici Saveza i u stručnim časopisima u Federaciji BiH priznatim od Komisije.

Član 17.

Ovaj Pravilnik stupa na snagu narednog dana od dana objavljivanja na web stranici Saveza, a primjenjuje se od 01. 01. 2010. godine.

Mostar, 30. 12. 2009. godine

Predsjednik Upravnog odbora Saveza

Milan Dmitrović

Mostar, 30. 12. 2009. godine